

# 3 июля 2024 года

## День Независимости Республики Беларусь

### СОВЕРШАЕТСЯ МОЛЕБЕН И ЛИТИЯ:

**Диакон:** Благослови, (Высокопреосвященнейший или Преосвященнейший) владыка.

**Иерей:** Слава Святей, и Единосущней, и Животворящей, и Нераздельней Троице, всегда, ныне и присно и во веки веков.

**Хор:** Аминь.

**Диакон:** Миром Господу помолимся: *до прошения: О плавающих:*

*К обычным прошениям присоединяем особая:*

- О еже исправитися молитве нашей сей, яко кадилу пред Спасителем нашим Богом, и приятися сей жертве сердец и устен, исповедающихся Господеви в день спасения, услышавшему люди Своя в день печали, Господу помолимся.

- О еже непреобориму и победительну всегда над враги Отечеству быти, и мир и славословие Богу утвердити в земли нашей христианстей, Господу помолимся.

- О еже даровати нам благодать от ныне и до века верою, и любовью возвещати спасение, и силу, и Царство Бога нашего, и область Христа Его, подавшему Отечеству нашему силу, и богохранимому народу воздавшему радость спасения Своего, Господу помолимся.

- О избавитися нам:

- Заступи, спаси, помилуй:

- Пресвятую, Пречистую:

**Возглас:** Яко подобает Тебе всякая слава:

**Диакон:** Слава Тебе, Боже наш, слава Тебе.

Царю Небесный...*с духовенством и народом.*

*Посем, Бог Господь, и явися нам: со стихами.*

**Тропарь, глас 4:**

Благодарни суще, недостойнии раби Твои, Господи, о Твоих великих благодеяниях **на Отечестве и людех его бывших**, славяще Тя, хвалим, благословим, благодарим, поем и величаем Твое благоутробие, и рабски любовию вопием Ти: Благодетелю, Спасе наш, слава Тебе.

**Слава, глас 1:**

Спаси, Господи, люди Твоя и благослови достояние Твое, победы православным христианом на сопротивных даруя и Твое сохраняя Крестом Твоим жительство.

**И ныне, Богородичен, глас 8:**

Взбранной Воеводе победительная, яко избавльшися от злых, благодарственная восписуем Ти, раби Твои, Богородице, но, яко имущая державу непобедимую, от всяких нас бед свободи, да зовем Ти: радуйся, Невесто Неневестная.

**Диакон:** Вонмем.

**Иерей:** Мир всем.

**Чтец или диакон:** И духови твоему.

**Чтец или диакон:** Премудрость, вонмем.

**Чтец или диакон:** *Прокимен, глас 4:* Господь крепость людем Своим даст, Господь благословит люди Своя миром.

*Стих:* Принесите Господеви, сынове Божии, принесите Господеви славу и честь.

**Апостол ко Ефесеем, зачало 233.**

Братие, возмогайте о Господе и в державе крепости Его, облецытеся во вся оружия Божия, яко возмоци вам стати противу кознем диавольским, яко несть наша брань к крови и плоти, но к началом и ко властем и к миродержителем тмы века сего, к духовом

злобы поднебесным. Сего ради примите вся оружия Божия, да возможете противитися в день лют и вся содеявше стати. Станите убо препоясани чресла ваша истиною, и оболкшеся в броня правды, и обувше нозе во уготование благовествования мира, над всеми же восприимше щит веры, в немже возможете вся стрелы лукаваго разжженныя угасити. И шлем спасения восприимите, и мечь духовный, иже есть Глагол Божий.

### Евангелие из благодарственного молебна

*Сугубая ектения*

*Рцем вси:*

**По Еще молимся о богохранимой стране нашей: присоединяем прошения особая:**

- Еще молимся, о еже прияти Господу Спасителю нашему исповедание и благодарение нас, недостойных рабов Своих, и в годину искушения, пришедшаго на Страну нашу через Великую Отечественную брань избавил людей Своих, и внегда, обышедше, обыдоша нас врази наши, явил есть нам спасение Свое, победу на супостаты и мир Отечеству нашему.

- Еще молимся Тебе Господу, Богу нашему, о еже призрети на людей Своих и Милостиву быти, и отвратити весь гнев Свой, праведно движимый на ны, сохранить в мире Отечество наше, междусобныя брани и нестроения отгнати, христианскую любовь вселити в сердца наша, здравие воином нашим подати и помиловати ны.

**Возглас:** Услыши ны, Боже, Спасителю наш:

**Хор:** Аминь.

Со духи праведных скончавшихся души раб Твоих, Спасе, упокой, сохраняя их во блаженной жизни, яже у Тебе, Человеколюбче.

В покоищи Твоем, Господи, идеже вси святии Твои упокоеваются, упокой и души раб Твоих, яко Един еси Человеколюбец.

Слава: Ты еси Бог, сошедый во ад и узы окованных разрешивый, Сам и души раб Твоих упокой.

И ныне: Едина Чистая и Непорочная Дево, Бога без семени рождшая, моли спастися душам их.

Диакон: Помилуй нас Боже...

Хор: Господи помилуй. (Трижды)

Диакон: Еще молимся о вождех и воинех наших, на поле брани жизнь свою положивших, от ран и глада скончавшихся, в пленении и горьких работах невинно умученных и убиенных, и всех Победы ради потрудившихся, яко да даст им Царь славы в день праведнаго Своего воздаяния жизнь вечную и венцы нетления.

Хор: Господи помилуй. (Трижды)

Диакон: Яко да Господь Бог учинит души их, идеже праведнии упокоются.

Хор: Господи помилуй. (Трижды)

Диакон: Милости Божия, Царства Небеснаго, и оставления грехов их, у Безсмертнаго Царя и Бога нашего просим.

Хор: Подай Господи.

Диакон: Господу помолимся,

Хор: Господи помилуй.

### **Молитва:**

Боже духов и всякия плоти, смерть поправый и диавола упразднивый, и живот миру Твоему даровавый! Сам Господи, упокой души усопших рабов Твоих **вождей и воинов живот свой за веру и Отечество на поле брани положивших**, от ран и глада скончавшихся, в пленении и горьких работах невинно умученных и убиенных, и всех Победы ради потрудившихся, в месте светле, в месте злачне, в месте покойне, отнюдуже отбеже болезнь, печаль и воздыхание. Всякое согрешение, содеянное ими, словом, или делом, или помышлением, яко Благий Человеколюбец Бог прости, яко несть человек, иже жив будет и не согрешит, Ты бо един, кроме греха, правда Твоя правда во веки, и слово Твое истина.

**Возглас:** Яко Ты еси Воскресение, и живот, и покой усопших рабов Твоих...

**Диакон:** Господу помолимся.

**Хор:** Господи, помилуй.

**Иерей:**

Боже Великий и Непостижимый, спасаяй погибающия, животворяй мертвыя, вся творяй по воли Твоей, и дивным Твоим промыслом управляяй всяческая! Приклони ухо Твое с высоты святыя Твоя и прими от нас, смиренных и недостойных рабов Твоих, сердцем и усты возносимая Тебе благодарственная сия моления, исповедания и славословия.

Ты глагола еси древле сыновом Израилевым, яко, аще не послушают гласа Твоего хранити и творити вся заповеди Твоя, наведеши на них язык безстыден лицом, иже сокрушит их во градех их, дондеже разорятся стены их. И мы ведехом, яко исполнился глагол сей страшный на народе нашем.

Но Ты, Господи Боже, Щедрый и Милостивый, Долготерпеливый и Истинный и правду храняй и творяй милость, милостию велиею помиловал еси и, посетив жезлом неправды наша, ущедрил еси нас победою на сопостаты. Темже утвердися сердце наше в Господе нашем, вознесся рог наш в Бозе нашем, возвеселихомся о спасении Твоем./ Благодарим Тя за избавление Отечества от врага лютаго. Дажь нам, Господи, память сего славнаго Твоего посещения/ твердо и непрестанно имети в себе, еже всегда благодарити и славословити: слава Тебе, Богу, Благодетелю нашему, во веки веков.

**Хор:** Аминь.

**Диакон:** Премудрость.

**Хор:** Честнейшую Херувим:

Слава, и ныне: Господи, помилуй (*трижды*). Благослови. ***И отпуст:***

Христос, Истинный Бог наш, молитвами Пречистыя Своея Матере, святых славных и всехвальных апостол, святаго великомученика и Победоносца Георгия, преподобных матери

нашея Евфросинии и всех святых в земли Белорусской просиявших, и всех святых, помилует и спасет нас, яко Благ и Человеколюбец.

**Диакон:** Во блаженном успении вечный покой подаждь, Господи, усопшим рабом Твоим, приснопамятным вождем и воином за веру и Отечество на поли брани жизнь свою положившим, от ран и глада скончавшимся, в пленении и горьких работах невинно умученным и убиенным и всем Победы ради потрудившимся, и сотвори им вечную память. *(Каждение)*.

**Хор:** Вечная память *(Трижды)*. Души их во благих водворятся, и память их в род и род.

**Диакон:** Многолетие *(одно общее - Патриарху, Митрополиту, властем и воинству, Богохранимем Стране нашей Белорусской и всем zde присутствующим ....)*